



Pou Piblikasyon Imedya: 18/05/2022

GOUVÈNÈ KATHY HOCHUL

## GOUVÈNÈ HOCHUL ANONSE PLENT YO DEPOZE KONT AMAZON

***Divizyon Dwa Moun Eta New York la afime diskriminasyon sou gwo sès ak andikap sou sit travay Amazon yo***

Gouvènè Kathy Hochul te anonse jodi a ke Divizyon Dwa Moun Eta New York la te depoze yon plent kont Amazon, Inc. ki afime konpayi an angaje nan diskriminasyon kont travayè ki ansent yo ak travayè ki gen andikap yo nan refize yo akomodasyon ki rezonab. Divizyon an afime tou ke Amazon gen règleman ki fòse travayè ansent yo ak travayè ki gen andikap yo pran konje san peye olye pou pèmèt yo travay avèk yon akomodasyon ki rezonab.

"Administrasyon mwen an pral kenbe nenpòt anplwayè responsab, kèlkeswa li gwo oswa piti, si li pa trete travayè yo avèk diyite ak respè yo merite", **Gouvènè Hochul te deklare**. "New York gen pi gwo pwoteksyon travayè nan peyi a epi se youn nan premye ki gen pwoteksyon pou travayè ki ansent ak sila yo ki gen andikap. Gason ak fanm k ap travay yo se poto mitan New York epi nou pral kontinye kanpe kont nenpòt enjistis y ap fè fas".

Lwa sou Dwa Moun Eta New York la egzije pou tout anplwayè yo, sou demann, akomode yon fason rezonab travayè ki gen andikap oswa kondisyon ki gen rapò ak gwo sès yo. Sa ka gen ladan modifikasyon fonksyon nan travay ki pèmèt yon anplwaye reyalize fonksyon esansyèl travay yo. Amazon, ki jere 23 sit travay avèk plis pase 39,000 travayè atravè Eta New York, anplwaye "Konsiltan Akomodasyon" entèn pou evalye demann sa yo ak rekòmande aksyon awopriye. Divizyon an afime ke règleman Amazon ki pèmèt manadjè sit travay yo kontoune rekòmandasyon ke Konsiltan Akomodasyon an te fè yo te lakòz yo refize anplwaye Amazon yo akomodasyon rezonab pou andikap ak kondisyon yo ki gen rapò ak gwo sès.

Divizyon an afime tou ke dapre règleman sou akomodasyon Amazon nan, anplwaye ki gen andikap yo oblige pran konje medikal san peye nan sitiyasyon kote Konsiltan Akomodasyon an te idantifye yon akomodasyon rezonab ki t ap pèmèt anplwaye a reyalize fonksyon esansyèl pòs yo san fado eksesif. Règleman oswa pratik ki fòse anplwaye yo pran yon konje medikal ki pa peye diminiye tèm ak kondisyon travay pou anplwaye ki gen andikap yo epi kont Lwa sou Dwa Moun nan.

**Komisè Adjwen Divizyon sou Dwa Moun pou Aplikasyon Lalwa, Melissa Franco, te deklare**, "Depi ane 1970 yo - plizyè ane anvan Lwa sou Ameriken ki gen Andikap yo - Eta New York te entèdi diskriminasyon kont anplwaye ki ansent nan milye travay la. Divizyon an pral travay pou asire tout moun nan eta nou an jwenn tout dwa ak diyite lalwa egzije".

Nan plent lan, Divizyon an afime yon travayè ki ansent te mande epi te jwenn apwobasyon pou resevwa yon akomodasyon rezonab pou evite leve pake ki depase 25 liv. Sepandan, manadjè sit la te refize swiv akomodasyon an - fòse travayè a kontinye leve pake ki lou. Malgre plent entèn yo sou mank akomodasyon an, Amazon pa te pran okenn mezi pou asire chanjman nesesè yo te fèt epi travayè ansent lan te soufri blesi pandan li t ap leve pwa lou. Apresa, travayè a te bezwen plis akomodasyon akòz blesi a. Amazon te refize demann lan epi fòse travayè ansent lan antre nan konje endetèmine ki pa peye.

Divizyon an afime ke yon lòt travayè Amazon te jwenn refi ki pa kòrèk lè li te mande yon orè trava modifye akòz yon andikap ki pwouve. Kondisyon travayè a te mande yon orè dòmi espesifik epi travayè a te soumèt dokimantasyon medikal ki jistifye sa ansanm ak demann lan. Anvan demann lan, travayè a te chanje orè travay avèk yon kòlèg pou akomode kondisyon sa san objeksyon direksyon an. Konsiltan Akomodasyon Amazon nan te rekòmande pou yo bay travayè a orè travay modifye li te mande a. Sepandan, manadjè sit la te refize aplike akomodasyon an san li pa bay okenn eksplikasyon. Konsiltan Akomodasyon an pa te konteste refi manadjè a. Olye de sa, Konsiltan Akomodasyon an te anile rekòmandasyon yo epi te refize demann lan kote li pale de yon mank kondisyon ki kalifye - malgre dokimantasyon medikal yo te resevwa anvan.

Nan yon lòt ka ki soti nan plent Divizyon an, ajans lan te afime ke yo te refize yon travayè ki te mande yon rediksyon nan lè travay akòz andikap, malgre Konsiltan Akomodasyon an te apwouve sa nan kòmansman. Manadjè sit travay Amazon nan te refize chanje orè travayè menm apre plizyè semèn korespondans avèk Konsiltan Akomodasyon an. Evantyèlman, Amazon te detèmine ke demann lan pa te gen ase dokimantasyon medikal ki jistifye li. Olye pou li kontinye yon dyalòg avèk travayè a pou jwenn dokimantasyon medikal apwopriye jan lwa Eta New York la egzije sa, Amazon te refize demann lan epi te fèmen dosye a.

Plent Divizyon an ap chèche yon desizyon ki egzije Amazon pou sispann konduit diskriminatwa li, pou adopte règleman ak pratik ki pa diskriminatwa konsènan revizyon demann pou akomodasyon rezonab yo, pou fòme anplwaye li yo sou dispozisyon Lwa sou Dwa Moun lan yo, ak pou peye nenpòt amann sivil ak penalite bay Eta New York.

Divizyon Dwa Moun lan resevwa pouvwa nan men lalwa pou envetige ak pouswiv lajistik modèl sistematik diskriminasyon sa yo atravè Inite Aksyon Inisyé Divizyon an. Inite sa kapab, selon pwòp inisyativ li, kòmanse envestigasyon yo ak depoze plent ki afime vyolasyon lwa anti-diskriminasyon eta a. Yon fwa yo depoze yo, yon inite apa nan Divizyon an ap envestige plent lan ak pibliye konklizyon yo. Plent yo ke yo jwenn ki

gen motif pwobab ap fikse pou yon odyans administratif devan Inite Odyans Divizyon an. Malgre plent lan se yon dokiman prive, desizyon final Divizyon an sou plent lan pral disponib pouiblik la. Pou plis enfòmasyon sou pwosè Divizyon Dwa Moun nan, ale sou [www.dhr.ny.gov](http://www.dhr.ny.gov).

###

Lòt nouvèl disponib sou sit [www.governor.ny.gov](http://www.governor.ny.gov)  
Eta New York | Chann Egzekitif | [press.office@exec.ny.gov](mailto:press.office@exec.ny.gov) | 518.474.8418